


TEZAU LITURGIC
12 AUGUST

SLUJBA
SF.CUVIOS-MUCENIC
VARLAAM
KONOPLEV
DE LA
BELOGORSK



MOSCOVA, 2000



**Месяца августа в 12 день
Служба
преподобномученику Варлааму,
архимандриту Белогорскому
и иже с ним пострадавшим**

НА МАЛЕЙ ВЕЧЕРНИ

На Господи воззвах: стихиры, глас 2.

На образ твой зряще, преподобне отче, / хвалим
тя и радостию радуемся, / кроток быв и смирен
сердцем, / плоды принесл еси Христова
смирения / яко древо благосеннолиственное, / и
нас научи смирять души наша / пред Отцем
Небесным и братьями нашими, // да обрящем
вечную победу с тобою.

Все твое желание к Богу прострый, / путь
постнический совершил еси, отче, / и ныне
вновь призывает тя Господь ко служению
Церковному, / орудием ты крепким сотворяя, /
да враги всех благ низвержени будут, // и да
хвалится вечно твоя память.

Се ныне не предел еще Божия о нас
благоволения, / что речем о сих, яже ныне
содеваются? / Ныне помазуешися от Духа
Свята, на служение Христова, // отче Варлааме
приснопамятне.

Образ смирения Христова и любви Его / житием твоим показал еси, преподобне, слезно взывая: / тщитесь достигнуть совершенства, яже Любы есть. / С духовным деланием и телесного труда не презирати, / но творящий же сия // не ослабнут в правде Божией во веки.

Слава, глас той же:

Приидите вернии, ко Христу любовию утренююще, / да радости страдальца предивного причастницы будем. / Ныне ангелы на небесех и человецы на земли радуются. / Да видяще, како любит Господь верных своих, // и мы Царствию Христову приобщимся.

И ныне, праздника.

На стиховне стихиры, глас 6.

Имже образом желает елень на источники водные, / сие возжаждал еси ко Христу Богу, / на горах присно взывая во изумлении: / благослови, душе моя, Господа. / Ныне же предстоя Ему неизреченно, / Варлааме преподобне Боговидче, / ниспосли нам огонь божественныя любви, // да тою очистим души наша.

Стих: Честна пред Господом / смерть преподобных Его.

Больши сия любви никтоже имать, / да кто душу свою положит за други своя. / Кровь твою

излиял еси за род человеческий, / помяни нас,
отче Варлааме, / да узрим в Духе Святе твое
милостивное предстательство, // и росой слез
твоих ороси мир и души наша.

Стих: Блажен мух бояйся Господа, / в заповедях
Его восхощет зело.

Велико и чудно явился житие Твое, Варлааме
преподобне: / истощивыйся до смерти лютыя,
до ада преисподнейшего, / возвысился еси до
ангельского дерзновения. / Невечернего света
насыщаешься / и ныне молися даровати душам
нашим // мир и велию милость.

Слава, глас тойже:

Сокровище Любве нетленные / припадаем ти,
моляся, Варлааме блаженне: / утверди нас нести
труды покаяния / и ради любви Господа терпети
вся болезни и вся скорби даже до конца, /
якоже ты, отче предивне, подвигом добрым
победив / венчался еси ангельскими лики // и
царствуеши ныне со Христом во веки.

И ныне, праздника.

Тропарь писан на велицей вечерни

НА ВЕЛИЦЕЙ ВЕЧЕРНИ

Блажен муж: 1-й антифон.

На Господи, воззвах: стихиры на 8: праздника
самогласны 3, глас 4.

Ины стихиры преподобномученику Варлааму,
глас 8.

Законом прадедним оплетшеся иногда, / на гору
Божью наемником восшед, / преобразился еси
преподобне Варлааме. / Христовой Церкви
сочетался еси, / отеческую веру и благодать
восприя, / мудрования человеков отменяя, /
начальник обители явился еси // и возгреме
чрез тебя глас Господень в концы.

Гора сия - Гора Преображения / всем с верой
притекающим соделалась / тобою препodobне
Варлааме. / Монахов множество собрал / и,
страждущих с любовью принимая, / лесная
дебрь процвела. / Гора сия Голгофою явися
преподобным - // слезами и кровью освящена.

Ины стихиры преподобномученикам
Белогорским, глас 1.

Телеса ваши на растерзание предасте /
блаженнии Сергие и Илие, / духу плоть
покорившие, / Страшнии Страсти Христовы
сподобистесь восприняти. / Егда же главы ваши
сокрушены бысте // венцы небесныя восхитили
есте.

Множество ран претерпевше святии, / водою погублены на воде упокоения возрадовастесь / преподобнии Иоанне и Виссарионе, / Матфее и Савво. / С ними же долготерпением и множайшими кровьми // омылись есте светосиянно Иоасафе и Маркелле.

Царя Небеснаго воинству сопричтены, / земное воинство отвергосте рекше: / "Се, наша брань не к плоти и крови, / но к духовом злобы поднебесным". / Блажени живот свой положивши / не против отцев и братии шедшия, / но за ближния, други своя // всехвальнии Белогорстии преподобномученицы.

Слава, глас 6:

Преподобне отче, / Уральскаго Афона пастырю добрый, / достоблаженне мучениче Варлааме, / веры истинной поборниче, / надежды жизни будущей проповедателю, / любвию избыточествующ всем притекающим, / слезный к Богу молитвенниче, // испроси нам мир и велию милость.

И ныне, праздника.

Вход. Прокимен дне. И чтения три мученическая.

На литии стихиры праздника.

Слава, глас 5:

Приидите мучениколюбцы, / отцев блаженных
прославим - / белогорских молитвенников /
доблемудренно во обители земной трудившихся
/ и в селениях небесных упокоившихся, /
воистину до крови подвизавшихся. / Темже и
сугубые венцы стяжавшие, / молим вы,
преподобнии мученицы, // испросите нам
оставление грехов и велию милость.

И ныне, праздника.

На стиховне стихиры праздника.

Слава, глас 6:

Житейская шатания отвергнув, / Христовой
благодати взыска / дондеже обрете место
Божие, / идеже монахов населил еси стада. /
Пастырю милосердный, / преподобномучениче
Варлааме, / утешителю скорбящих и
маловерных, // не забуди нас, молящих ти ся.

И ныне, праздника.

Тропарь, глас 4:

Узы и страдания кротко претерпел еси, /
свидетельствуя о Любви Христовой даже до
смерти. / Избранник Божией Матери явился
еси, / горняго мира смирением достигл
преподобне Варлааме. / И ныне милостиво
посещая чад твоих, / моли Христа Бога //
спастися душам нашим.

Ин тропарь, глас 8:

От юности пути Христова вождедел еси,
преподобномучениче, / на Горе, Богом
избранной, вселился еси; / и, множество иноков
собрав, светильник сонму христолюбцев явился
еси. / За любовь к ближним безбожными умучен
был еси; / и ныне моли Христа Бога,
преподобномучениче Варлааме, / о нас, чтущих
святую память твою.

НА УТРЕНИ

По 1-м стихословии седален, глас 4:

Званию Господа твоего последовал еси, мир
отверг и вся яже в нем красная, всеблаженне
Варлааме, претерпел еси пустынное озлобление
усердно, полки же отразил еси демонов
мужественне. Темже твою память присно
песньми восхваляем верно.

Слава, и ныне, праздника.

По 2-м стихословии седален, глас 4:

Земленных и тлеющих наслаждений небрегосте, и
пустынное житие возлюбисте, мира красоты и
пищи временныя возненавидевше, и отсюда
сподобистесь мученическому и постническому
сочтаться лику: с нимиже молитесь спасти рабы
ваша.

Слава, и ныне, праздника.

По полиелеи седален, глас 6:

В пощении искусен быв, во страдании просиял еси, и просветил еси верныя твоими подвиги, блаженне Варлааме: темже ты вси согласно величаем.

Слава, и ныне, праздника.

Степенна, 1-й антифон 4-го гласа.

Прокимен, глас 4-й: Честна пред Господом смерть преподобных Его.

Стих: Что воздам Господеву о всех, яже воздаде ми.

Евангелие от Матфея, зачало 38.

По 50-й псалме стихира со стиховны: Житейская шатания отвергнув:

Канон праздника на 6 и святого на 8.

Канон святого,
егоже краегранесие: Варлаама новаго
Святогорца прославим.

Глас 8.

Песнь 1

Ирмос: Воду прошед, яко сушу, и египетского зла избежав, израильтянин вопияше:
Избавителю и Богу нашему поим.

Воспети по достоянию утверди нас, Господи,
новаго мученика Твоего, преподобнаго

Варлаама, да славится тем Имя Твое, Дивнаго во святых Своих.

Ангельскому жительству прилежа, Писаниям Божественным от юности навыкнув, борюция страсти разумею, Христу вопиял: Жизнодавче, оживи мя Духом Твоим Святым.

Распалися сердце твое о Бозе, во оправданиях Господних поучаяся, к молитве обратися, блаженне, от прелести мира отвращая Путь и Истину и Живот взыска.

Богородичен: Лица Твоего не отвори от нас, Владычице, о египетских снедах скорбящих, и научи пети Избавителю и Богу нашему.

Песнь 3

Ирмос: Небеснаго круга Верхотворче, Господи, и Церкви Зиждителю, Ты мене утверди в любви Твоей, желаний краю, верных утверждение, Едине Человеколюбче.

Апостольские предания мудрованиями расколоучителей отметаея позна, блаженне, егда благодать обрести возжада, странствованию предахся. От бездны же отчаяния потщался избавитися, истинную Церковь Христову явити молихся.

Аще овцы без пастыря, како благодати пажити обрящут - взывал еси? Тем же нощным стенанием вопиял: яви нам, Господи, место,

идеже священницы Твои, в правду облеченныя!
Молебствия православных бегая, тайно же в
бездождии с ними моляся, знамения благодати
просил - каплющую росу духовную в душу
приятти.

Абие одожди Господь милости Своя, яви чудо по
молебствию, посла пастыря Своего, на молитву
веры призирая, от неведения разрешити и
светом облистати тя.

Богородичен: Нетвердые стопы наша, человеком
угождающая, к Сыну Твоему и Богу управи,
Владычице Богородице, от неплодия души
избавляя.

Ин кондак, глас 7:

Молитвою теплою к Богу / родную землю согрел
еси; / евангельски пожив, досточудне, / людей
заблуждших умудрил еси. / Молися, небесный
человече, // за нас, земных и недостойных.

Седален, глас 4:

Стратное покорил еси плотское мудрование, и
горшая поработив лучшему, отче Варлааме,
преславне сокрушил еси бесовския козни
постом, и возсиял еси в мире яко луча
солнечная, сиянии твоих добродетелей: сего
ради тя воспеваем.

Слава, и ныне: праздника.

Песнь 4

Ирмос: Ты моя крепость, Господи, Ты моя и сила, Ты мой Бог, Ты мое радование, не оставль недра Отча и нашу нищету посетив, Тем с пророком Аввакумом зову Ти: силе Твоей слава, Человеколюбче.

Отвергше прадедния блуждания обретох Благодать и Истину; Петру архиерею хлеб и от пчел сот яко Христу в дар принося, преподобне, Хлебом Жизни питаем, уста твоя медоточныя содела.

Восхищением непщева благословение яти, неразумныя, како благодать имате, убежала бо вас - взывал еси, блаженне, сродников и друзей, в расколе коснеющих, к Чаше спасения привлекая.

Аще Церковь кто преслушает, яко язычник и мытарь вменяется, како отметаешься Пославшего самовидцев, како с Телом Христа разлучаетесь - витийствова преподобне, неведением гибнущих исцеляя.

Богородичен: Грехами богатеющих спаси ны, Царице Небесная, и осужденным милость испроси, не имамы бо иныя помощи разве Тебе.

Песнь 5

Ирмос: Просвети нас повелении Твоими, Господи, и мышцею Твоею высокою Твой мир

подаждь нам, Человеколюбче.

Обитель возводити наемником пришед,
благодатию уловлен, начальник и строитель
явился преподобне и в ангельский образ
облеклся.

Столпом облачным и образом креста молнииным
избранное место многажды Господь верным
открыва, устройство обители благословляя,
призва тя, богомудре Варлааме, пасти zde стадо
свое.

В афонской пустыни жителствовати ревнуя,
святое послушание стяжевая, Промыслу
повинулся, блаженне, Уральский Афон
возрастити потщался.

Богородичен: Ясти и питии, играти и по воле
греховней ходити навыхох, в руке Божией быти
не умудрихся, окаянен, но Ты, Пресвятая Дево,
просвети скудоумие мое.

Песнь 6

Ирмос: Ризу мне подаждь светлу, одеяйся светом
яко ризою, Многомилостиве Христе Боже наш.

Трудами, молитвою и постом образ делания
иноческаго дая, наипаче послушанию навыхати
научал еси, преподобне Варлааме, всем
послушлив бывая.

От плена египетскаго людие моисейски
избавляя, на Гору Боговидения восшед, закон

жития иноческаго восприя и учеником даде, к многоплодию души направляя.

Гласом кротким и слезами многими неправых увещавая, блаженне, простотой, смирением и любовью терпеливно побеждал еси.

Богородичен: Осквернихся беззаконьми многими, добродетелей наг явихся, срамные одежды имам, но милостию Твоею, Пресвятая Дево, ущедри мя и покрый.

Кондак, глас 4:

Яко постника искуснаго / и страдальца
Боговенчаннаго, / горняго жителя и Боговидца
/ в песнех достойно восхвалим Варлаама
приснохвальнаго, // той бо змия лукаваго
попрал есть.

Икос

Страстем Господним подражая, умерети за истину сподобился еси, леств безбожнаго суетства разоряя, мужески подвигся противу врагов Церкви Православныя, тех злохитрости и неистовства, и козни низложил еси, и венец почести приял еси Варлааме, преподобне страдальче. Тем верою прибегаем и зовем ти, от враг видимых и невидимых избави нас, ты бо змия попрал есть.

Песнь 7

Ирмос: Отроцы еврейстии в пещи попраша пламень дерзновенно и на росу огонь преложиша, вопиюще: благословен еси, Господи Боже, во веки.

Радоватися сердцем, в храм идуще, поучал еси, преподобне Варлааме, яко сподобил Господь со святыми Отцами славословие приносить: Боже, благословен еси.

Церковь соборную возвести потщался, блаженне, на Господа печали и попечения возложил еси, по вере же богатая милостыни приях, храм зело преукраси зовуще: Боже, благословен еси.

Ангельски предстояти Богу и воспевати со страхом братию наставляя, богомудре Варлааме, умиленной службой все концы благодатно просвети взывать: Боже, благословен еси.

Богородичен: Печальми житейскими смущаем, унынием побеждаюся, маловере, к Тебе, Пречистая Госпоже, вопию: изведи ум мой от скорби, снедающей мя.

Песнь 8

Ирмос: Царя Небеснаго, Егоже поют вои Ангельстии, хвалите и превозносите во вся веки.

Ради Христа уды душевныя и телесныя весь день умервщляя, напоследок воистину яко овца закления вменихся, преподобне.

Огрубевшие в неверии сердца любовью твоею растопляхуся, души страждущия дивно к жизни возставляхуся, велиих бо таинств явился еси собеседниче, блаженне.

Слову Божию вечер и завтра притекающих назидая, преподобне Варлааме, молчанием и молитвою труды своя растворяти потщался еси.

Богородичен: Лютыми страстями расхищаему, удобее молчание хранить, обаче Тобою, Дево Богородице, дерзаю и аз вопити: благословите вся дела Господня Господа.

Песнь 9

Ирмос: Воистину Богородицу Тя исповедуем, спасении Тобою, Дево Чистая, с Бесплотными лики Тя величающе.

Апостольскими стопами на Гору Преображения восшед, веру Петрову и любовь Иоаннову яви, преподобне, напоследок же умучен бых, надеждою Иаковлевой окриляем показася.

Во узах духом креплий, на страдания вольно грядый, Христу подобясь, плачущим заповеда: плачьте о себе и детях ваших.

Исповеда пред ангелы и человеки Имя Господне, муки претерпе, венец доброты восприя, славне: тело бо водной глубине предадеся, душа же водами нечестия не потоплена бысть.

Богородичен: Мати Божия, Благая Вратарнице,

не попали нас, грехми болезнующих, яко оных безумцев, Лику Твоему ругавшихся, огонь бо появ место беззакония их.

Светилен:

Процвел еси яко финикс давидски, отче, и обитель явился еси Духа Пресвятаго, и славна тя вселенней показа. О нас непрестанно моли, почитающих верою пречестную память твою, преподобне Варлааме.

Слава, и ныне, праздника.

На хвалитех стихиры на 6: праздника 3 и ины стихиры преподобномученикам, глас 2:

Киими хвалебными песньми / воспоим богомудраго Варлаама, / ко спасению неустаннаго путеводителя, / попечителя душ немощных, / белогорскаго светильника. / От погибели многия обративый, премудре, // молимся ти помози и нам грешным.

Преподобнии мученицы, / не дасте сна очима вашим и веждама дремания, / в броня правды облекшеся, / пути Господни разумеете / и в заповедях Его текосте, / и тако во святых жребии свои кровьми восприяете, // - воистину добрую куплю сотворили есте.

Преподобнии наставницы, / святой жизни проповедатели, / блаженней вечности земнии устроители, / страстей душевных и недугов

прогонители, / алчущих питатели и скорбных посетители, / и всякой душе озлобленной скорые утешители, // молим вас, помозите и нам грешным.

Слава, глас 1:

Мира познасте безумие, / блаженнии белогорцы, / избра вас себе Господь, / во искушения ввергох, / любящим Его смертью поспешествуя, / во благих души водворих. // Воистину никтоже разлучи вы от любви Божия.

И ныне, праздника.

НА ЛИТУРГИИ

Блаженны праздника песнь 7-я и 8-я от обоих канонов на 4, и святаго песни 6-я на 4.

Прокимен, глас 7: Восхвалятся преподобнии во славе, и возрадуются на ложах своих.

Стих: Воспойте Господеви песнь нову, хваление Его в церкви преподобных.

Апостол к Римлянам, зачало 99

Аллилуиа, глас 6: Блажен муж бояйся Господа, в заповедях Его восхощет зело.

Стих: Сильно на земли будет семя его.

Евангелие от Лука, зачало 64.

Причастен: Радуйтесь праведнии о Господе, правым подобает похвала.

